

Inatsisartut aalajangiiffigisassaattut siunnersuut Naalakkersuisut pisussaatinneqassasut timmisartuussinissamik Namminersorlutik Oqartussat isumaqatigiissutigisartagaat 2012-umi neqeroorutigineqalerpata ukiunut qulinut atuuttussanngorlugit isumaqatigiissusiortoqassasq.

(Inatsisartuni ilaasortat Knud Kristiansen aamma Siverth K. Heilmann, Atassut)

Akissuteqaat

(Ineqarnermut, Attaveqarnermut Angallannernullu Naalakkersuisoq)

Siullermeerneqarnera

Knud Kristiansen aamma Siverth K. Heilmann aalajangiiffigisassatut siunnersuummut saqummiussaannut qutsavigaakka.

Kalaallit Nunaanni timmisartumik angallassinermi kiffartuunneqarnissamik isumaqatigiissutit ullumikkut atuuttut ukiuni tallimani atuuttussaapput. Isumaqatigiissutit maannakkut atuuttut ukiunik marlunnik sivitsorneqarput, taamaattumillu atuuffissaat 31/12 2012-imi naasussaalluni. Piffissap atuuffiusup sivisussusaanut pingaaruteqartut pissutsit assigiinngitsut arlaliupput.

Piffissaliussap sivikinnera sullissisunut, kiffartuunneqarnissamik isumaqatigiissutinut neqerooruteqarusuttunut pilerinanginnerusinnaavoq – pingaartumik kiffartuunneqarnissamik isumaqatigiissutinut ukiumut akiliutaasartoq allanngortassanngitsoq naatsorsuutigissagutsigu. Tamatumani ilaatigut neqerooruteqartitsinerni neqeroorusiornermut, ilaatigullu – sullissisussap suliaasaq neqerooruteqartitsivigineqartoq pissarsiarippagu – timmisartunik/qulimiguulinnik, sulisunik il.il. suliaasanik isumaginittussanik pissarsiniarnissamat isumalluutinik atuisoqartarnera tamatumunnga pissutaavoq. Tamatuma saniatigut aamma neqerooruteqartitsinermut Namminersorlutik Oqartussat isumalluutinik atuisariaqartarput.

Paarlattuanik piffissaliussap sivisunerunerani, soorlu maani siunnersuutigineqartutut ukiuni qulini, timmisartuussinerit naleqqussarniarneqarnerat ajornakusuulersinnaavoq, kiffartuunneqarnissamik isumaqatigiissummi kiffartuussinerup qaffasissusissaa, akiliutit il.il. aalajangersarneqarsimasussaammata. Kiffartuunneqarnissamik isumaqatigiissutit taamaalillutik isorliunerusuni timmisartuussinermi allannguisinnaanermut Namminersorlutik Oqartussat periarfissaannut killiliisinnaapput.

Aalajangiiffigisassatut siunnersuummi innersuussutigineqartutut kiffartuunneqarnissamik isumaqatigiissutit eqaannerulersillugit suliarineqarnissaannut periarfissaqarpoq. Tamannali sullissisumut isumaqatigiissutit nalingisa ajornerulernerinik kinguneqartussaavoq, sullissisup isumaqatigiissummi qulakkeeriffigineqarnera, taamaalillunilu aningaasaqarnikkut iluaqutissat annikillissussaammata. Tamanna aamma timmisartuussinermut atatillugu aningaasartuutitigut malunniuteqarsinnaassaaq. Eqaassusiliinernik ilanngussisoqassappat, ukiunut qulinut isumaqatigiissusiornermi iluaqutissarpassuit ilaat taamaalillutik tammartussaapput.

Ukiuni tulliuttuni nunasseriaatsit inuussutissarsiutinullu tunngaviusut sukkasuumik ineriartorerisa ingerlaannarnerisa Kalaallit Nunaanni misigineqarnissaa naatsorsuutigineqarpoq. Tamanna siunissami isorliunerusuni timmisartuussinermik pisariaqartitsinermut sunniuteqarsinnaavoq. Timmisartumik assartuussinerit piumaneqarnerisa ineriartorerata saniatigut aamma inuussutissarsiutinik ineriartortitsinerup Kalaallit Nunaanni timmisartumik assartuussinernik neqerooruteqartarnerit annertusitissinnaavaa. Aamma tamanna eqqarsaatigalugu ukiut qulit siunissami kiffartuunneqarnissamik isumaqatigiissusiornissamut atuutsitsivissatut pitsaanerpaajungitsut paasinarsisinnaavoq.

Tamatuma saniatigut Kalaallit Nunaanni timmisartukkut angallannermi kiffartuunneqarnissamik isumaqatigiissutit atuuffiisa ukiunut qulinut sivitsorneqarnissaat Unammilleqatigiinnermik Nakkutilliisoqarfiup inassuteqaataanut uniuuttussaavoq, tassunga ilassutitut erseqqissaatigimmagu piffissap isumaqatigiissuteqarfiusup ukiunik tallimanik sivisussuseqarnera, Unammilleqatigiinnermut Nakkutilliisoqarfiup siusinnerusukkut uparuarsimasaattut nunanut uatsinnut sanilliuttakkatsinnut naleqqiullugu sivisunerungaatsiareermat. Kiisalu piffissaq isumaqatigiissusiorfiusup sivitsorneqassappat unammilleqatigiinneq ajoquserneqarsinnaavoq, aammalu Kalaallit Nunaanni timmisartuussinerup niuerutigineqarnerani sullissisussat nutaat sulilernissaannut akornutaasinnaalluni.

Kiisalu oqaatigineqassaaq, timmisartukkut angallannermut kiffartuunneqarnissamik isumaqatigiissutit atuuffissaasa sivisussusilerneqartarnerat sullissisunut isumaqatiginninniarnerni Naalakkersuisunut tunngavissatut pingaaruteqarmat. Taamaattumik siumoortumik piffissaq atuutsitsivissaq ukiunut qulinut aalajangerneqareertassappat, Naalakkersuisut isumaqatiginninniarnissamut tunngavissamik pingaarutilimmik annaasaqassappat, taamaalillunilu timmisartukkut angallassinermi piunasaqaatit ataatsimut isigalugit pitsaanerpaat qulakkeernissaannut periarfissaat annikillissallutik.

Taamaattumik tamanna tunngavigalugu oqaluserisassap itigartinneqarnissaa Naalakkersuisut inassutigaa.